

Neočekivan ishod

MAKEDONIJA — SRBIJA 53:48 (28:26)

Slavonski Brod, 31. januara

Drugi dan juniorskog Turnira republika u košarci potvrdio je mišljenje da nema unaprijed određenih favorita. Prije utakmice Makedonija — Srbija niko nije mogao povjerovati da će doći u pitanje pobjeda ekipe Srbije. No, od prvog sudijskog zvižduka borbeni Makedonci su pokazali da su u stanju da to demantuju i u jednoj vanredno žustroj i interesantnoj utakmici ostvarili su prvu pobjedu — 53:48 (28:26). Igra se odvijala u brzom tempu koji je impresionirao sve prisutne.

Loš utisak na ovu utakmicu ostavilo je slabo suđenje. Još jednom su se pokazale stare slabosti sudijske organizacije koja za ovakva takmičenja delegira sudije koji su po opštoj ocjeni nespremni. Kao posljedica slabog suđenja proizašla je i žalba na ovu utakmicu, od strane ekipe Srbije.

Najbolji pojedinci u ekipi Makedonije bili su Ivanovski (12 koševa), Hristovski (18) a Pavlović (16) u ekipi Srbije. Sudili su Vojnović i Tošić.

SLOVENIJA — BOSNA I HERCEGOVINA 82:60 (37:27)

Prema rezultatu izgleda da ekipa Slovenije nije imala težak put do pobjede. No, ekipa Bosne i Hercegovine pružila je dobru igru i jedino može zažaliti što u svojim redovima nije imala izrazito visokog igrača — realizatora na mjestu centra. Ovo je najljepša utakmica koja je dosad odigrana na turniru. Obje ekipe su, i prema riječima saveznog kapitena Ranka Zeravice, demonstrirale pravu košarku.

Ekipa Slovenije je sigurnom igrom uspjela da izvojuje prvu pobjedu zahvaljujući prije svega vanredno raspoloženom Hočevaru koji je

postigao 17 koševa. Pored njega istakli su se Šarić (19) i Brenk (12), dok su u ekipi Bosne i Hercegovine najbolje igrali Tanović (14), Užičanin (14) i Roljić (14). Sudili su Protić i Markotić.

HRVATSKA — CRNA GORA

85:32 (29:16)

U samom početku utakmice ekipa Crne Gore je veoma odlučno ušla u igru i bila ravnopravan protivnik ekipi Hrvatske. No, brzim kontranapadima i dobrom odbranom, igrajući »čovjek na čovjeka«, ekipa Hrvatske je uspjela da obezbijedi visoku pobjedu.

Najbolji u ekipi Hrvatske bili su Bračun (21) i Jelić (9), dok je u ekipi Crne Gore nešto bolji od ostalih bio Lalević (17). Sudili su Purić i Dasevski.

Z. ŠERBEDŽIJA